



2.februar 2014

UPA2014/160

Inatsisartut suleriaasianni § 36 naapertorlugu apeqquteqaat aallaavigalugu oqallisissiaq imaattoq matumuuna saqqummiuppara:

**Nunatsinni inuusuttut inuiaqatigiinni kiffartuusseqataanissaat anguniarlugu minnerunngitsumillu suliffissaaleqisut nunaqarfinni illoqarfinnilu kiffartuusseqataanermi periarfissaqartinneqarnissaat nunattalu iluani kiffartuusseqataanikkut suleqataanissaat anguniarlugu kommuunit peqataatillugit periarfissanik qulaajaanissamik misissuisoqarnissaanik oqallinnissamik siunnersuut.**

(Inatsisartunut ilaasortaqaq Hans Enoksen, Partii Naleraq)

Ukiuni makkunani nunatsinni tamani, avanersuarmi, avannaani, qeqqani, kujataani tunumilu nunaqarfinni illoqarfinnilu annertoorujussuarmik suliffissaaleqisoqarpoq, uggornarluinnartumillu inuusuttut amerlasuut suliffissaqanngillat, soorunami tamanna ilungersunartutut tigusariaqarpoq suliniarfigineqartariaqarlutillu.

Inuiaqatiginnut tamatsinnut ilungersunartuuvoq innuttaasut sulisinnaasorpasuuqaluartut tamakkiisumik atorneqanngimmata, pingaartumik aamma inuusuttortagut eqqarsaatigalugit, minnerunngitsumillu aamma kommuunit aningaasarsiornikkut nukittuumik ingerlanissaannut soorunami suliffissaaleqisitsinerput aamma ineriartornissamat noqqitsisuummat, taamaattumik ataatsimoortumik siunnerfilimmik inuusuttortatta ineriartornissaannut ataatsimoorluta kivitseqatigiinnissarput saneqqunneqarsinnaajunnaarpoq.

Ilaatigut eqqarsaatigisariaqalerparput inuiaqatigiinni kiffartuusseqataaneq aallarteqqinneqartariaqartoq, tassanilu aamma Namminersorlutik oqartussat kommuunillu ataatsimoortumik suliaqarnissaat aallartinneqartariaqalerpoq, inuusuttorpasuummi nukingat aamma inuiaqatigiinni iluaqutigineqalertariaqarmat, nalunngilarpummi annertuumik inuiaqatiginnut tunniussaqaarsinnaasut suleqataatinneqarnermikkut, periarfissaqalernissaallu massakut aallartinneqartariaqalerpoq.

Suliffissaaleqisuuneq inummut peqqinnanngitsoq tamatta ilisimalluarparput, ilaqutariit tamarmik sunnerneqartarput, meeqqanut inuusuttunut inersimasunut utoqqanullu tamanut sunniuttarpoq, ilaatigut suliffeqarnikkut periarfissaqaraanni ajornartorsiutigineqarsinnaanngikkaluartut annertuumik inuuniarnermi aqusaartorneqalersarput, allaat ilaqutariit avissaartuunnerannik kinguneqartarlutik, soorunami taamatuinnaq ingerlaaseqalersinnaaneq ilungersunarsiartuinnartoq akiorniartariaqarparput ataatsimoorluta.

Inuusuttunik aallussineq sakkortusartariaqarparput, ilinniarsinnaanerinit pikkorissarsinnaanerinit inuttullu nukittorsarneqarnissaannut periusissat ilisimaneqareersut aallartinneqarlutillu atorluarneqalertariaqarput, inuusuttunik sullissisut arlallit nunatsinni ingerlareersut soq tamakkiisumik atunngilagut, inuusuttortagut naak ikiorneqarnissaminnik pisariaqartitsigaluartut amerlasuut isiginnaaginnarpagut, taamaallaalli aasiit kommuunit ikiunissaat kisiat eqqarsaatigalugu ingerlatsilluta, tamannalu tamatta allanngortittariaqalerparput taamatut ingerlaaseqalertiartuinnarnerput illersorneqarsinnaanngimmat.

Inuiaqatigiinni inuusuttut kiffartuusseqataasarnerat misillittagaqarfigeerparput, assullu tamanna malunnartumik sulinikkut ineriartornikkullu iluaqutaasartoq uppersaatissaqareerpoq. Savaatillit nunaqarfiit illoqarfiit piniartoqarfiillu ineriartortinnerinut assut iluaqutaalluareersoq nalunngikkaluarlugu unitsinneqarnikuuvoq, isumaqarluinnarpungalu tamanna aallartinneqaqqittariaqartoq.

Tassami ullumikkut naliginnaasumik inuiaqatigiit iluanni ataatsimut suliffissaaleqisut tusintit ataasiinnaanngitsut suliffissaaleqisuutigaagut, soorunami tamarmik aamma kiffartussinerup iluani aallartissinnaanngillat, ilaat periarfissaqartinneqartariaqarput inuttut ingerlariaqqinnissamut nukittorsarnissaannut, ilaat pikkorissaanikkut aallartinneqartariaqarput, ilaallu ilinnialersinnaanerat tunngavigalugu periarfissarsiuullugit aallartinneqartariaqarlutik.

Assersuutigalugu inuusuttunik sullissinerit iluatilluartut ilaat TIMI ASIMI piffissamik sivilsunngitsumik ingerlatsinerminni inuusuttut arlalippassuit alloriartippaat, ilaat ilinniarnissaminnut allaat periarfissaqalerlutik, soorlu taamaattut ingerlatsinermik aallartitsilluartut iluatinnarluinnartut isigalugit tapersersorneqartariaqarput atorluarneqartariaqarlutillu.

Inuusuttut ingerlariaqqinnissaat tapersersortigu, aqutissat ilsimasagut pigisagullu misilittakkagullu aallarteqqittariaqarpagut, inuusuttoq nunatsinni atorfissaqartipparput, pissutsillu ilungersunarsiartuinnartut inuusuttut suliffissaaleqinermikkut atugaat qaangerniartariaqarput pimoorullugit suliarisariaqalerpagut ineriartornikkut inusuttortagut katataajartuinnassanngippata.

Oqallilluarisi inuusuttut nunarpullu pillugit.